

DRAMA Mujakići iz Velike Kladuše zbog kredita izgubili krov nad glavom



Iznošenje nepokretnog Enesa Mujakića

Banka uzela stan porodici teškog invalida!

Enesa Mujakića, njegovu ženu Arifu i djecu Ernesta i Rijane sudski izvršitelji izbacili iz stana uz pomoć policije
● Nisu mogli vratiti kredit od 30.000 KM, jer je hranitelj porodice doživio nesreću ● Arifa polila stan benzinom

Gradani Velike Kladuše jučer su bili svjedoci prave drame u ulici Maršala Tita neposredno uz zgradu Općinskog suda.

Porodica stopostotnog invalida Enesa Mujakića deložirana je iz stana, a na ulici su, osim njega, završili i njegova supruga Arifa te dvoje njihove maloljetne djece, 13-godišnji Ernest i devetogodišnja Rijane.

Stigla i Hitna

Deložacija je izvršena po nalogu Suda u Kladuši, zbog namirenja duga „Raiffei-

sen“ banci“, po osnovu kredita koji je Mujakić uzeo, ali nije mogao vratiti. Njegova supruga Arifa jučer je završila u kladuškoj Policijskoj stanici, jer je ulazna vrata i stan bila polila benzinom! No, srećom, do požara nije došlo.

Posmatrači su bili šokirani prizorima očajne porodice koja je gubila jedini krov nad glavom. Osim policije, koja je dežurala cijelu noć,

jučer oko 11 sati došli su i vatrogasci, sudski izvršitelji, kola Hitne pomoći te predstavnici Centra za socijalni rad, advokati.

Porodica Mujakić nije htjela niti mogla izaći iz stana.

Deložacija Mujakića je posljedica sudske presude prema kojoj je stan koji je ova porodica platila 140.000 KM prodat za 40.000 KM kako bi se izmirio dug „Raiffeisen banci“.

Enes Mujakić u ovoj banci je podigao 30.000 KM kredita da bi isplatio stan.

U međuvremenu je teško nastradao, još 2007. godine, kada je pao na gradilištu u Hrvatskoj s devet metara visine na glavu. Ostao je 100-postotni invalid i, kako su nam prenijeli članovi porodice, još čeka pravosnažnost presuđene odštete u toj državi.

Upali specijalci

Kako on ne može ni govoriti, njegova supruga Arifa pokušala se na sve načine dogovoriti s bankom o nižim

ratama ili odgođenom plaćanju, ali uzalud.

Jučer su tek nakon dva sata pregovaranja i ubjeđivanja policijski specijalci upali u stan i, prema riječima Arife, vrlo grubo s njom postupali, nakon čega su odvedena djeca, dok je supruga Enes iznesen na nosilima.

Četveročlana porodica sa 100-postotnim invalidom nema ni privremeni smještaj. Nije poznato gdje su prenoćili nakon velike drame i izbacivanja iz stana u koji su uložili sav svoj imetak. **M. DEDIĆ**

2007.

godine Mujakić na gradilištu u Hrvatskoj ostao invalid

Hoće li bh. vojna oprema služiti filmu Emira Kusturice

Okolić: Nismo dobili odluku Predsjedništva

Povodom informacije da je iz Kabineta predsjedavajućeg Predsjedništva BiH Željka Komšića naloženo načelniku Zajedničkog štaba Oružanih snaga BiH generalmajoru Anti Jeleću da suspendira odluku Ministarstva odbrane BiH o izdavanju opreme i naoružanja s pripadajućim vojnicima za potrebe snimanja filma Emira Kusturice, iz ovog ministarstva saznajemo da im nikakva naredba nije stigla.

Mirko Okolić, zamjenik ministra odbrane BiH, kazao nam je da je sve vrijeme u komunikaciji sa članovima Predsjedništva BiH koji nisu na godišnjem odmoru te tvrdi da nikakav akt i nikakva odluka o suspendiranju



Okolić: Poštovat ćemo odluku Predsjedništva BiH

odluke Ministarstva odbrane BiH nisu stigli na njihovu adresu.

- Svaki član Predsjedništva BiH ima legitimno pravo na stav, sumnju, i tako dalje, ali to nije obavezujuće

ni za koga. Obavezujući su samo stavovi Predsjedništva BiH. Dakle, svaki član treba izglasati i svoj stav pretvoriti u stav Predsjedništva BiH. Takvu odluku ćemo poštovati - podvukao je Okolić.

Podsjećamo, premaspornoj odluci, Oružane snage BiH trebale su ustupiti vojnu opremu i naoružanje ekipi Emira Kusturice za potrebe snimanja njegovog filma „Namljičnom putu“.

Iz Ministarstva odbrane BiH potvrdili su nam da im je stigao zahtjev od producerske kuće iz Trebinja, ali su i pojasnili da je prvobitna odluka stavljena van snage zbog proceduralnih nedostataka te da za sada ništa nije odobreno. **B. B.**

GIKIL donio odluku o štrajku



Koksara u Lukavcu: Proizvodnja neće biti potpuno obustavljena

Izbjeći sudbinu 'Dite'

U prostorijama GIKIL-a jučer je održana Skupština Sindikata radnika ove lukavačke fabrike, na kojoj je donesena definitivna odluka o stupanju u štrajk više od 1.000 nezadovoljnih uposlenika.

Radnici su poručili da ne žele kašnjenje plaća, a poučeni sve češćim gašenjem i propadanjem fabrika, kako su kazali, ne žele doživjeti sudbinu „Dite“, „Aide“ i

drugih tuzlanskih fabrika.

- Ako se samo jedan mjesec zakasni, nema tog gazde i sistema koji će nam je moći namiriti. Mi, poučeni iskustvom na tržištu, nemamo se čemu dobrom nadati. Fabrike se zatvaraju, a mi u GIKIL-u želimo izbjeći tu sudbinu - kazao je Mirsad Imamović, predsjednik Sindikata radnika GIKIL-a. **A. Mu.**



Osmanagić: U ulozi domaćina

NVO „Svjetlo“

Posjeta piramidama

► Mladi s umanjenim sposobnostima, članovi NVO altruista „Svjetlo“ i Kluba osoba s invaliditetom Kragujevac, jučer su bili gosti Semira Osmanagića, s kojim su posjetili bosanske piramide u Visokom. Također, u labirintu „Ravne“, 25 metara ispod zemlje, saznali su više o misterijama i čudima drevne civilizacije.

Prijedor Paketići za prvačice

► Načelnica Odjeljenja za društvene djelatnosti Prijedora Ljiljana Babić potvrdila je da je iz banjalučke Izdavačke kuće „Lanaks“ jučer stiglo 640 prigodnih poklon-paketića koji će početkom školske 2013/2014. godine tradicionalno biti uručeni prvačicama prijedorskih osnovnih škola. Distribucija paketića do škola počće danas.

Enes Suljkanović



Suljkanović: Generalni pokrovitelj

Manifestacija u Kotorskom

► Potpredsjednik RS Enes Suljkanović prisustvovao je Četvrtoj manifestaciji „Baška pohod - Kotorsko 2013“ koja se održava u Mjesnoj zajednici Kotorsko, kod Doboja. Suljkanović je i generalni pokrovitelj ove manifestacije koja je okupila više od hiljadu ljudi iz Kotorskog i susjednih mjesta, ali i veliki broj Kotorana koji žive širom svijeta.

Porezna uprava

Zatvoreni objekti

► Porezna uprava Federacije BiH zapečatala je sedam objekata na području Kantona Sarajevo za koje, prema obavještajno-istražnim podacima, postoje saznanja da krše odredbe Zakona o fiskalnim sistemima. Zapečaćeni objekti su „Rajvosa“, „Meza bor“, „Buffet klub SDP“, „Šeherzada“, „Fast Food Halal“, „Pub Pirat“, caffè bar „Mango“ i caffè bar „Napoli“.